




1538



高太史大全集

Inches 1 2 3 4 5 6 7 8

Centimetres 1 2 3 4 5 6 7 8 9 10 11 12 13 14 15 16 17 18 19



Blue Cyan Green Yellow Red Magenta White 3/Color Black

**TIFFEN** Color Control Patches

© The Tiffen Company, 2007










高太史大全  
集十八卷

四部叢刊集部





上海涵芬樓借江南  
圖書館藏明景泰間  
徐庸刊本景印原書  
版匡高營造尺五寸  
九分寬四寸

高太史大全集叙

故嘉議大夫戶部侍郎前翰林國史院  
編脩官授諸王經青丘先生高啓文  
集二十四卷舊一千若干篇今二千若  
千篇儒士徐庸字用理之所廣也用理  
既以類廣先生文集乃以示昌昌謹爲  
序之曰夫將以所學明先王之道救當  
世之弊則必著于言焉庶幾見者之用



聞者之有效也六經更聖人之手其言粹然一出於正要之所以存鑒戒者亦多聖人既沒縱橫捭闔之說興大道幾微漢廣游學之路董生賈誼始各以其學自見著書數千萬言沉雄簡奧其明先王之道陳當世之務畧備矣唐韓愈起力變八代之衰習故其言惟醜而杜甫李白又各以其學自見明王道具時

政謂之詩史宋歐陽脩博學力行本論之言有益於治至朱元晦則根據六經之旨攘斥百氏之非巋然爲世儒宗其大要使人審王伯之畧致義利之辨而已今諸家之言具存考之可知用之猶尚可行也蓋三代而下漢唐宋之所以聲德著業而繼焉以稱治者有賴於是焉先生生元丙子少稟神慧長讀六經



諸家之言融而通之會而成之又取而力行之其發之於言則浩乎如大川之決防也鏘乎如洞庭之張樂也儵乎如幽壑之舞蛟也致之於用則如射者之於的準乎其無疑也然值國步之既促不苟於用隱於青丘登高望遠撫時懷古其言多激烈慨慷若將於世無足爲者及我

太祖高皇帝定鼎建業肆

詔徵賢先生起與元史之脩錄善醜惡儒者之功庶幾彰施史成授諸王經進戶部侍郎尊顯極至先生感之力頌先王之道以匡濟世務言多雄偉竒古足以聳張德業裨益治化時甚賴之未久即辭去去後亦蹇連以死嗚呼殆天所以厄斯文也嘗竊論焉天道惡滿取之



不可以全然詘其身則必信其聲是以  
董賈賤逐而名長甫白窮放而詩傳韓  
愈歐陽脩朱元晦雖號通顯而未免罷  
斥然其言至於今誦習而師承者不衰  
正柳宗元所云生而不遇死則垂聲者  
衆也先生死始三十有九使少優游而  
待之則得將止於是乎言將止於是乎  
行將止於是乎嗚呼天實爲之謂之何

哉用理師學於先生之言得之既深遂  
勤圖傳之亦使聞者考之而可知見者  
用之而可行以明其言之果有賴於世  
也嗚呼厚矣


景泰元年庚午冬十二月望日

賜進士出身吳劉昌序



缶鳴集序

人生而形具矣形具而聲發矣因其聲  
而名之則有言矣因其言而名之則有  
文矣故文者言之精也而詩又文之精  
者以其取聲之韻合言之文而爲之也  
豈易也哉近之於身遠之於物大之爲  
天地變之爲鬼神與凡古今治政民俗  
之不同史氏之不及具載者取而詠歌





之載賡之不費辭說而極乎形容之妙  
比興之微若是者豈非風雅之遺意哉  
宜君子有以取之吳郡高君季迪少有  
俊才始余得其詩於金華見之未嘗不  
愛及來京師同在史局又得其所謂  
缶鳴集者閱之累目不倦合古今體數  
百首其事雖微可以攷得失備史氏之  
所懲勸其辭則余之所欲摹擬而莫之

工者鏗鏘振發而曲折宵如也果何自  
而得之方吳郡未入板籍不幸爲潛竊  
者據之擅其利者十年矣士於是時熟  
不苟升斗之祿以自活鬻釜間季迪日  
與之處曾不曉焉顧乃率其儔類倡和  
乎山之厓水之澨取世俗之所不好者  
而好之含毫伸牘鳴聲咿咿及其得意  
又自以爲天下之樂舉不足以易其樂




焉此其所得爲如何哉吾聞鍾聲鏗而  
立踈石聲磬而立辨絲聲哀而立簾竹  
聲濫而立會鞀鼓之聲灌而立動若缶  
鳴之聲果何音也其西音乎南音乎抑  
太古之遺音乎不然則天下將治正始  
之音將作而此其兆乎何爲一旦而及  
吾身也得乎天者不求知於人求知於  
人者不得乎天季迪不求知於余而余

知之者商聲之歌不必出於己也而曾  
子歌之焱氏之頌不必費辭也而後世  
稱之則季迪之樂亦余樂也嗟夫懂懂  
徃來朋從尔思孰能爲余發其吟風之  
趣乎季迪由是求之其於道也幾幾矣  
洪武二年秋七月長山病叟胡翰序



缶鳴集序

高季迪詩十二卷凡爲樂府五七言近古體九百三十七首余爲叙而評之曰季迪之詩雋逸而清麗如秋空飛隼盪旋百折招之不肯下又如碧水夫渠不假雕飾翛然塵外有君子之風焉以余之所言而余之所不言從可知已然則季迪之詩集不可傳也歟季迪中吳人





余嘗論吳中之詩唐有陸魯望宋有范  
至能魯望之詩寄興幽遠而其音響則  
駸駸已迫於晚唐至能之詩措辭溫綽  
然其格調特宋焉而已耳在勝國時余  
適吳則陳子平詩其為言率實而流麗  
揆之陸范吾不知其孰先孰後也吳之  
詩在元惟子平而知者蓋鮮今吾於是  
復得季迪之詩焉季迪年方壯志氣偉

然其所自見殆不止於詩而其於詩則  
已能自成家與唐宋以來作者又不知  
孰先孰後也嗟乎詩之道微矣世之有  
志於斯者莫不鞠明窳矐疲心思於簡  
牘間而後為言乃或有可傳其不可傳  
者固不可勝數是不可不謂之難也以  
詩之難能如此而季迪乃以此自成家  
追古之作者以為並豈非其才之過人



也歟序而傳之世必有因其詩而知其  
才者矣季迪名啓季迪字也頃承 詔  
與余同脩元史尋入 內府教習子授  
翰林國史編脩云  
洪武庚戌三月翰林侍講制金華王禔  
序

缶鳴集序

言之精者謂之文詩又文之最精者何  
以知其然耶二氣爲之橐籥而鼓之以  
風霆然後天之聲出焉衆竅爲之呼吸  
而盪之以江河然後地之聲出焉受形  
於兩間而靈於物者爲人然氣至混然  
天成發宣鴻鬱然後人之聲出焉凡人  
有聲斯有言有言斯有文文至於詩包



括品彙陶冶化工根乎性情之真達於  
音響之妙宮商間作金石並鳴由是而  
聲之用極矣世皆知以詩而觀詩或未  
知以文而觀詩因謂詩特文章之末技  
庸詎知聲成文謂之音而詩之中文已  
具焉韓退之之言曰李杜文章在光燄  
萬丈長斯言也其善論詩者已然非天  
機悟入識見超詣亦何足以語此哉渤

海高君季迪踈爽雋邁警敏絕人無書  
不讀而充遂於群史與余友二十年余  
知季迪之能言也久然未嘗不以其詩  
而得之也始季迪之爲詩不務同流俗  
直欲趨漢魏以還及唐諸家作者之林  
每一篇出見者傳誦名隱隱起諸公間  
及游四方不懈益勤刮磨漱滌日新月  
異薦紳諸老咸自以爲不及季迪之於



詩誠精矣然其意則自謂古風人一辭  
不如是也三百篇之傳豈皆出於一人  
之手或著其一二皆可以遺之後來尚  
奚以多爲哉吾非欲成一家言亦性焉  
而嗜之之篤殆與人之耽悅世好者同  
一肆志留情而其樂蓋未能以此而易  
彼也聞者以爲然當其一室燕坐圖書  
左右離列拂拭塵埃几案間冥默靚思

神與趣融景與心會魚龍出沒巨海中  
殆難以測度或花間月下引觴獨酌酒  
酣氣豪放奇作楚調已而吟思俊發湧  
若源泉捷如風雨頃刻數百言落筆弗  
能休故季迪之詩緣情隨事因物賦形  
橫縱百出開合變化而不拘拘乎一體  
之長其體制雅醇則冠冕委蛇佩玉而  
長裾也其思致清遠則秋空素鶴迴翔




欲下而輕雲霽月之連娟也至其文采  
縟麗如春花翹英蜀錦新濯其才氣俊  
逸如秦華秋隼之孤鶩昆侖八駿追風  
躡電而馳也季迪之於詩可謂能盡其  
心焉尔季迪之詩甚多有吹臺集缶鳴  
集鳳臺集凡為書幾二千首皆當世之  
儒先君子序其端今年冬予訪之吳淞  
江上季迪出其詩示予盖取舊所集諸

詩益加刪改彙粹為一總題曰缶鳴集  
自古樂府歌行而下至五七言諸體得  
詩三百餘篇皆其精選富矣哉亦可謂  
不易矣然是編也特以今年庚戌冬而  
止後有作當別自為集季迪不以余不  
肖屬余序之庸敢叙諸編端以俟季迪  
家姑蘇嘗應召脩元史教西學弟子負  
入翰林為編脩擢戶部侍郎 賜歸鄉



里云

洪武三年十二月既望史官吳郡謝徽  
序



高太史大全集卷之一

吳郡高啓季迪著

南州徐庸用理編

古樂府

上之回

聖主重行幸六蚪法乾旋北巡初避暑東祠已祈季  
群官從清塵祭若星麗天前揚豹尾竿左靡魚須旃  
瀚海通漢月蕭關絕胡煙願奉千齡樂皇躬長泰然  
君子有所思行

騁望京輔地金城千里餘  
我我松栢陵  
靄靄桑柘墟



明堂表青陽飛觀切紫虛况有戚里第高樓夾清渠  
愛妾舞羅縠嬖奴鳴珮琚東園賜秘器上林乘副車  
玄運有恒旋盛時無乂屈勿嗤城南巷寂寞楊雄廬

李夫人歌

延年罷歌少翁望蘭芬淒淒銷複帳臨歿最難忘歛  
歛不相嚮陳杯觴列燈火是耶非幄中坐新宮漏殘  
星欲墮

古別離

它人豈不別所別諒有由嗟君今何營輕薄好遠遊  
遥遥京洛車汎汎江漢舟君身非賈胡所至自輒留

微音已冥邈思懷尚綢繆露滋紅蘭春霜變綠桂秋  
此時望歸來含情上高樓川途本無限君去焉得休  
願令中斷阻化彼山與丘

燕歌行

清商變節朱火遠嚴霜塗庭卉木腓邊城早寒未授  
衣念君邀征不能歸涼風時來動中闈蠨蛸在戶熠  
耀飛賤妾宵興歎無依簪珥不施減容輝欲寫憂思  
撫瑤徽君今不在聽者稀啓明未出燈已微愛而不  
見徒歔歎

吳趨行



僕本吳鄉士請歌吳趨行吳中寔豪都勝麗古所名  
五湖洶巨澤八門洞高城飛觀被山起游艦沸川橫  
土物既繁雄民風亦和平泰伯德讓在言游文學成  
長沙啓伯基異夢表休禎舊閣允幾家奕代產才英  
遭時各建事徇義或騰聲財賦甲南州詞華並西京  
玆邦信多美粗舉難備稱願君聽此曲此曲匪誇盈

南山有鳥

南山有鳥北山羅兩地一失驚風波哀鳴獨宿心靡  
他竟抱幽恨歸山阿不及山上松纏綿同女蘿君歸  
來聽妾歌相思感君情意多贈君明珠淚滂沱死生

茫茫終柰何

玉波冷雙蓮

金風暮剪雙頭蓋啼臉辭秋媽血紫宮女三千罷笑  
喧錦雲障冷鴛鴦死滿江煙玉流古香尋魂吊影愁  
茫茫吳天墜露衰紅濕一夜波涼小龍泣

蓋秀葯華

春香上羅襦暗引蘭橈渡蝶散掩紅房王孫歸已暮  
斜條拂蛾鬢采擷同芳杜脉脉兩煙濃江皋斷腸路

吳鉤行

吳鉤若霜雪吳人重遊俠樽前含笑看上有仇家血



短歌行

置酒高臺樂極哀來人生處世能幾何哉日西月東  
百齡易終可嗟仲尼不見周公鼓絲拊石以永今日  
歡以別虧憂因會釋燕鴻載鳴蘭無故榮子如不樂  
白髮其盈執子之手以酌我酒式咏短詠爰祝長壽

白馬篇

白馬金鏤鞍流光皎如練龍沙積雪裏一去誰當見  
昨日羽林兒獨拜建章殿天子親賜與騎向交河戰  
疾驅不辭家恐獲逗遛譴萬里修若飛神速虜難變  
前收日逐屯右斷康居援事定入關來箠中有餘箭

宛轉行

宛轉復宛轉宛轉日幾迴君腸鹿盧斷我腸車輪摧

長門怨

憎寵一時心塵生舊屋金苔滋銷履迹花遠度鑿音  
暮雀重門迥秋螢別殿陰君明猶不察妬極是情深

班婕妤

徽誠雖可守妙彝却難工已別增成舍初來長信宮  
扇歸秋篋裏燭滅夜帷中莫忘爭新寵曾辭玉輦同

閭闔篇

天門迎旭開紫霞八表洞達春無涯閣道縈迴度鸞



車羽旗揚彩鍾鼓擗後宮三千人秀色掩盡世上花  
宸遊時過廣成家瑤觴再壽盛露華一仁興萬福加  
何須慕神仙辛勤鍊丹砂小臣微詞欲拜獻帝德自  
大非爲誇

塞下曲

日落五原塞蕭條亭候空漢家討狂虜籍役滿山東  
去年出飛狐今年出雲中得地不足耕殺人以爲功  
登高望衰草感歎意何窮

折楊柳歌詞二首

高枝拂翠幃低枝垂綺筵春風千萬樹此樹妾門前

江頭橫吹悲北客休南去聞道武昌門愁人無別樹

空侯引

濁流赴海東若傾津卒刺船朝不行公乎提壺徑欲  
渡大聲呼公公不顧飢鯨饒蛟肆啖吞竟以深淵作  
高墳貪生惡死誰不有公獨不然果狂叟二十五絃  
彈且歌公今渡河將柰何公今渡河將柰何

將進酒

君不見陳孟公一生愛酒稱豪雄君不見楊子雲三  
世執戟徒工文得失如今兩何有勸君相逢且相壽  
試看六印盡垂腰何似一卮長在手莫惜黃金醉青



春幾人不飲身亦貧酒中有趣世不識但好富貴亡  
其真便須吐車茵莫畏丞相嗔桃花滿溪口笑殺醒  
遊人絲繩玉缸釀初熟搖蕩春光若波綠前無御史  
可盡歡倒著錦袍舞鸚鵡愛妾已去曲池平此時欲  
飲馬能傾地下應無酒罈處何苦寂寞孤平生一杯  
一曲我歌君續明月自來不須秉燭五岳既遠三山  
亦空欲求神仙在杯酒中

雨雪二首

雨雪暗桑乾深愁沒馬鞍臨關倚月認霰積作沙看  
不阻胡兒獵聊供漢使殮春風消不得三月成袍寒

雨雪暗龍沙愁陰入漢家恨迷青冢草驚見黑山花  
夜積氊廬重朝隨羽旆斜空思鵝鵲觀柳色變年華

羅敷行

陌上三月時柔桑多綠枝携筐行采葉日暮畏蚕飢  
君來駐車馬相逢在桑下謾說同心言不是知音者  
君貴多輝光妾賤無紅粧自信田間婦難從天上郎  
長安畫樓宇無限如花女使君當早歸莫共羅敷語

當罈曲

光豔動春朝粧成暎洛橋錢多自解數筆澁未能調  
花如秦苑好酒比蜀都饒深謝諸年少來沽不待要



遊俠篇

遊俠向何處蕩蕩長安城中暮塵起殺人無主名  
所殺豈私仇激烈為不平新削安陵刀光奪衆目明  
不畏赤棒吏里間自橫行灌夫託為友素葢事以兄  
負氣不負勢傾身復傾情笑顧年少輩瑣瑣真可輕

關山月

月出遼海東朔雲捲胡風繞升榆塞遠復照柳城空  
影滿雕弧外光沉金柝中思家舉頭望今夜一軍同

鞠歌行

玉蘊彩劔閔鋒牛鐸之音混黃鍾俾神奇作妄庸揚

微察陋世罕逢物有合執必從如魚得水雲與龍夷  
吾囚伊尹農二主舉之享萬鍾嗟古人孰繼踪女子  
猶為悅已容

古詞

妾刀不斷機郎行當早歸還將機中錦作郎身上衣

王明君

都門塵拂春風面臨別看花淚如霰君王惆悵惜蛾  
眉不似前時畫中見白髮呼韓感漢恩寧胡謾號關  
支尊羶裘肉食本異俗不如但嫁平山村黃沙白雪  
無城闕手冷鷗弦夜彈歇相隨萬里到穹廬只有長



門舊時月妾語還憑歸使傳妾身沒虜不須憐願君  
莫殺毛延壽留畫商岩夢裏賢

烏夜啼

啼鳥驚多棲未久半起踈桐上高柳燈下佳人顰淺  
眉機中少婦停織手月入空閨夜欲深數聲猶似聽  
君琴

行路難三首

君不見盤中鯉暫失風濤登俎几君不見枝上蜩纔  
出糞壤凌雲霄推移變化詎可測勿謂明日同今朝  
出乘高車入大馬半是當年徒步者范叔曾逃客溺

餘衛青亦在人笞下悠悠行路莫相欺爲雌爲雄未  
可知

危莫若編庖須險莫若觸鯨牙行路之難復過此前  
有瞿塘後褒斜杯酒朝驩矛刃夕加恩仇反覆間楚  
漢生一家鈞弋死橐陽鷓夷棄江沙所以賢達人高  
飛不下避罟置行路難堪歎嗟

雕林玉案刺繡茵宜城酒多老照滿坐蜀北方之上  
客詩侑南國之佳人盛時徂流若川水榮貴長存竟  
誰是魏帝高臺碧瓦空梁王故苑黃塵起世人傾奪  
首未迴可憐不飲豕累累



劉生

結客諸陵下平生好排難  
鵝瑩白楊刀鵠驚黃柘彈  
投瓊速邸夜擊筑高樓旦  
念魚可報恩空推車壁歎

怨歌行

妾始充下陳嬾客常自持  
上宮三千妓一一妬蛾眉  
絃急有斷聲鏡暗無妍姿  
遂令開時花遽作落後枝  
昨夕歌吹歡今夕蠶語悲  
從來班婕妤不勝趙昭儀

雉子班

雉子班 雉朝陽低飛蓬蒿隱  
文章五步一咏于彼山  
梁爭雄決鬪憤氣張好勇守介性  
之良安能受馴畜

歛翼自摧傷

蒿里

素驂駕廣柳蕭蕭出城闈  
玄廬儼象設猶恐死有神  
古原閉愁寬荒草不得春  
一作泉下客長遠室中親  
昔興每待且今卧馬知晨歛  
衣已成灰含具仍作塵  
家門諒不遠欲歸竟何因  
平生所愛物娛玩由它人  
哀哉此里中同逝壯老均  
聖賢亦豈免聞道庶可珞

薊門行

行行光祿塞望望單于臺  
天寒水草盡萬里孤軍來  
中國多荒土窮邊何用開



巫山高

巴山西上巫峽深奇峰十二江之陰陽雲高臺不可  
尋但見丹楓碧樹攢幽林昔聞瑤姬在其下月爲環  
玦風爲襟空山又獨屋偶感襄王心楚宮閉秋夢彷彿  
來同衾神仙會遇當有道豈效世俗成荒淫千秋  
遺賦應多恨暮雨蕭蕭後自吟

上留田

有弟兄不見憐上留田行泣念彼先人上留田弟寒  
衣不蔽身上留田兄富出乘華軒上留田死而棺槨  
不全上留田它人爲塋古原上留田我行見此孤墳

上留田白楊一何翻翻上留田人生孰無弟昆上留  
田爾獨大義不救上留田隣人之歌悲不可聞上留  
田

董逃行

史侯稱臣董侯立山東義師烽火急羗兒夾輦奉西  
遷百姓驅隨棄村邑葦圭苑中高作營千里不復聞  
鷄鳴舊宮焚燒無片瓦黃金盡出諸陵下長安城頭  
日欲晡董逃歌殘歌布手

碧玉詩

碧玉小家女初無珠翠粧感郎相顧重朽質自生光



堂上歌行

堂上歌歌南山主人爲歡仰客顏翠帷夜卷出兩鬟  
移尊更飲花樹間花樹間有明月客不醉歌不歇

隴頭水

人間何處無流水偏到隴頭愁入耳夜雜羌歌明月  
中秋驚漢夢空山裏隴坂崎嶇九迴折聲隨到處長  
嗚咽欲照愁顏畏水渾前軍曾洗金創血回頭千里  
是長安征人淚枯流不乾

少年行二首

官侍長揚拜文即况憑內寵在椒房賜金十萬身無

用乞作胡姬一日粧

下直平明出禁門笑提博局伴玉孫寶刀不敢將輸

却明日沙塲欲報恩

芳樹

歲華映華闥窈窕臨清沼風姿巧弄春露氣微含曉  
垂條拂過騎翳葉留歸鳥忽憶共攀人徘徊行獨遠

放歌行

泰山玉檢書成功芝房正奏井泉宮漢家五葉彌全  
盛有似白日初當中雄鷄天上啼清曙春滿咸陽萬  
家樹諸侯客子盡西來只道明時苦難遇褐衣不脫



見至尊立談一刻皆承恩賡詩已上栢梁殿獻賦還  
過金馬門大道易登平若砥始信青雲絕尺咫共喜  
嚴徐得寵榮未容絳灌生諛毀丹詔仍聞訪草萊皇  
心務欲攬群材嗟君猶在新豐即日暮空詩歸去來

空城雀

空城雀何局促城頭飛城下宿百匝得一枝千啄逢  
一粟衆雛隨啾啾所欲各易足不須羨彼珍羽禽翩  
翩高集珠樹林一朝身陷虞羅裏回首空城不如尔

相逢行

沽酒渭橋邊平陵俠少年相逢各有贈寶劍與金鞍

妾薄命

寂寞復寂寞秋風吹羅幕玉階有微霜桂樹花已落  
昔爲卷衣女承歡在瑤閣棄魚感淚多當熊慙力弱  
寧知色易老難求黃金藥宮深去天遠憂思將何託  
君恩非不深妾命自輕薄微軀願有報和氣死沙漠

神仙曲

上清真人古仙子保神鍊魄從無始眉上霜毫如髮  
長幾見金烏日中死東遊不肖居蓬萊滄海頃刻飛  
黃埃金輿玉座儼何處爵藍天上彌羅臺碧桃落盡  
花無數一笑虛空卷煙霧烏篆玄文世莫窺茂陵還



掩蓬斜露

結客少年場行

結客須結遊俠兒，借身報仇心不疑。  
千金買得利匕首，摩挲誓許酬相知。  
白馬繆胡纓，行人盡止朝遊洛。  
北門暮醉秦東市，感君在一言，不惜爲君死。  
朱家會脫李將軍，田光終酬燕太子。  
君不見魏其盛時客，滿門自言一一俱銜恩。  
魏其既罷誰復見，養士堂中塵網遍。  
始知結客難，徒言意氣傾南山。  
食君之祿有弗報，何況區區杯酒間。  
結客不必皆薦紳，緩急叩門誰可親。  
屠沽往往有奇士，慎勿相輕閭里人。

長相思

長相思，思何長，愁如天絲遠，悠揚搖風曳，日不可量。  
不能絆去足，唯解結離腸，關山碧雲看欲暮，空幃坐掩，荃蘭香，長相思，思何長。

君馬黃

君馬黃，我馬玄，君馬金，臣我馬錦，連乾兩馬喜，遇皆嘶鳴，何異主人相見，情長安，大道可竝轡，莫誇得意爭先，行搖鞭共踏落花去，燕姬酒鑪在何處。

團扇郎

團扇團且潔，人言似明月，明月明月，豈得如長圓，不曾闕。



楊白花

楊白花太輕薄不向宮中飛却度江南落美人踏踏  
連臂歌山長水闊柰尔何柰尔何春欲晚何不飛去  
仍飛返洛陽樹多啼鴉愁殺人楊白花

門有車馬客行

門有車馬客乃是故鄉士昔別各壯顏今見不相似  
上堂叙情親拜跪出妻子對案未能食歷歷問桑梓  
當時同遊人十有八九死松栢長新墳荆棘生故址  
歡言方未終悲感還復始因思興謝端嘆息不能止

估客調

上客荊州商小婦揚州娼金多隨處樂不是不思鄉

擢歌行

溶漾漢潭清牽荷趁浪平船輕知體弱簪滑見鬟傾  
落日懸江思浮雲結浦情去從千葉隱歸愛一花迎  
吳歛井子夜誰似棹歌聲

鷄鳴歌

北斗城頭北斗低萬家夢破一聲鷄馬蹄踏踏車轆  
轆闕下連趨市中逐雄鷄安得噤尔聲利名少息世  
上爭漫漫夜長人不驚

華山巖



華山畿牛車止不同生可同死棺開棺開與郎去來  
長安有狹斜行

長安有狹斜斜狹斜僅容騎路逢兩俠童迴鞭問君第  
君第渭橋西易覓難復迷長子侍溫室次子籍金閨  
少子備宿衛光耀與兄齊三千每來返雜沓擁輪蹄  
大婦彈鶻鷄中婦舞前溪小婦勸杯酒能唱白銅鞮  
夫人莫遽起庭樹未烏棲

雙桐生空井

雙生碧玉樹並覆黃金井根通夕潤深葉帶朝光冷  
應有感秋人時來鑑愁影

征婦怨

良人不願封侯印帝符遠發當番陣幾夜春閨惡夢  
多竟得將軍軍覆信身沒猶存舊戰衣東家火伴爲  
收歸妾生不識邊庭路尋骨何由到武威紙幡剪得  
招魂去只向當時送行處

襄陽樂

門前黃柳鴉雛宿羅幌低垂婢擎燭懸璫結珮略粧  
成日莫相邀漢江曲水靜花寒月小明舟中樓上聞  
歌聲腸斷年年大堤路南商行過北商行

飲酒樂



七絃五絃角奏一觴兩觴羽行且樂眼中人聚莫憂  
頭上天傾

鳳臺曲

飛帟織霧秋痕薄星漢低宮花漠漠瓊臺夜寒閉羸  
女鷺管參差隔煙語瑤京舊侶招遠遊人間帳冷鴛  
鴦愁海影無塵月如夢仙骨不欺鸞背重哀蘭泣露  
空秦苑龍玉聲徹彩霞遠

美女篇

美女婉清揚白晳纖且長豔色照上國不殊古姬姜  
巧笑發令姿芳詞吐柔腸擢首有何物黃金作釵梁

珥懸磔砢珠緯帶霍納香新服製羅紈光輝麗青陽  
止袂綉蛺蝶下裙織鴛鴦姍姍步春風乍見驚欲翔  
雖有楚大夫善賦焉能詳豈徒騁妍媚况乃持貞良  
家屋闢高門宛在城中央過者共傾慕日晏停上襄  
借問誰氏子無非金與張蹇脩豈不勤通辭重珪璋  
中懷非所託鴈幣徒相將永宵歎遲回起倚東西廂  
君子苟未得年徂諒何傷

將軍行

將軍結髮從鞍馬新領前軍號橫野面謾不數屠狗  
兒負勇曾擒射雕者狼星掃天芒角斜大旗獵獵吹



風沙黃金傾盡養部曲匈奴未滅何爲家前日賢王  
五千騎直入朝那殺邊吏天子初聞怒赫然出師誓  
奪河南地五營材官无自多詔書未須徵七科已御  
明堂推畫轂還開武庫授彫戈灞陵原頭軍曉發北  
出雲中與高闕單于一夜六驛逃大漠無人唯漢月  
塞下從茲烽火稀朝臣共賀震皇威人生寧似功成  
樂白日長安鼓吹歸

長安道

長樂鍾聲動平津樹色開中郎長戟衛丞相小車來  
新城賜將第更築候神臺誰念公車客空懷作賦才

洛陽陌

九陌看春光紅塵起相接白玉車中郎綠珠樓上妾  
柳迷臨水影花映當鑪頰日暮過銅駝相逢盡豪俠

悲歌

征途險巖人之馬飢貧少不如富老羨遊不如惡歸  
浮雲隨風零亂四野仰天悲歌泣數行下

邯鄲郭公歌

郭公舞郭公舞天子無愁亦無苦醉後君臣一笑看  
鄴宮長夜襲襲鼓郭公郭公爾莫舞不解平城圖竟  
作長安虜高山摧爲一抔土



車送送

鷓鴣啼霜海城白征夫趣裝牛上軛天生兩轂轉長  
途那得令君不爲客出門已遠第一程耳中鳴鐸漸  
無聲房戶寧嗟寂寞守山川唯念苦辛行欲車不行  
願車覆還愁損我車中王安得身如芳草多相隨千  
里車前綠

楚妃歎

章華臺前楚江水月色墮煙鳥欲起六宮不敢解羅  
衣獵火照山君未歸

神絃曲

秋燈盡壁熏煙埃石馬汗流神下來花衫娑娑絃切  
切旋風吹幡愁百結雌狐學拜戴鬪體鬼箭射創血  
洒秋老鴉飛散巫姬泣苦篁嘯雨溪幽幽

白紵詞二首

白紵出自吳女工著來色與素體同舞時偏向江渚  
宮長袖拂起微有風觴催管促四座中攬裾徘徊慄  
曲終玉堦夜寒零露濃

出後閣臨前楹舞衣皎皎潔且輕飄如白雲向空行  
迴腰流目君已傾華燈吐燄欺月明喧譁不聞遺珮  
聲茱萸實紅蘭葉紫千秋懽樂長如此妾身得向君



前死

呵那瓌

牛羊草漫野大帳天山下十萬控弦兒聞猿齊上馬

江南意

妾本南國姝父母愛如珠貌豈慙明鏡身綵稱短襦  
學成采蓮唱曉出橫塘上舟小復身輕隨風兩搖蕩  
歸時曲岫傍恰見貴遊郎輟歌欲轉棹花淺不堪藏  
持嗔却成哂相問那能隱雖伶郎意深終嫌妾家近  
回首各盈盈南湖月又生煙波三十里都是斷腸情

銅雀妓

鄴宮已罷幸歌舞尚如期誰知看月夜却是望陵時  
薊澤銷羅薦松風吹總帷妾身未得死寧當憂色衰

猛虎行

陰風吹林鳥鵲悲猛虎欲出人先知目光燿燿當路  
坐將軍一見張矢墮幾家插棘高作門未到日沒收  
猪豚猛虎雖猛猶可喜橫行只在深山裏

湘中絃

涼風嫋嫋月鄰鄰行色蘭香秋水濱一夜猿聲流淚  
盡黃陵祠下泊舟人

獨不見



白日沉大荒北風下天霜羅幃猶苦冷何況戍遼陽  
別時秦槐青今復胡草黃紅淚常自滋非因效啼粧  
鴛機促夜響龍鏡掩晨光相思獨不見時久愈難忘

豔曲二首

日莫淇水上折花行見歡鴛鴦蘇合彈驪裏鏤衢鞍  
當時贈芍藥今日歎薜蘿少年不相顧唯愛執金吾

羽林郎

十五能挽弓入衛蒲萄宮武皇深假借父有沒邊功  
禿衿綉羅短馬逸双街斷綵出開鷄坊還過射熊館  
笑擲朱提銀娼樓爛醉春歸時衝市過辟易九衢人

橫行自無避司隸休相忌明日浚稽山爲君遮虜騎

燕燕于飛

燕燕何處飛相見江南路賞香細雨春柳色芳煙暮  
纔從落外歸復向舟前度莫入未央宮身輕有人妬

浮遊花

宛宛庭中花狂風忽吹去無涯上入逍遙之雲天下  
淩淩淡之泥沙開落本同何足歎升沉偶異自堪嗟

野田行

白楊樹下誰家墳火燒野草碑無文路傍尚卧雙石  
馬行人指是故將軍當時發卒開陰宅千里送塋城



東陌子孫今去野人來高處牧羊低種麥平生意氣  
安在哉棘籠暮雨棠梨開百年富貴何足恃雍門之  
琴良可哀

邯鄲才人嫁為厮養卒婦

妾能擬趙瑟舊得君王眷更衣直夜房侍酒登春殿  
出宮非故顏里婦猶相羨龍臺罷往夢破屋流螢見  
末路多若斯紛紛貴成賤

壯士行

無險非高山無勇非壯士半夜殺風來劍寒燈欲死  
秋風引

嗟爾秋風胡為來哉奏高律兮瑟颯而悲哀叩高柯  
而墮葉掃廣路以清埃入班姬之永巷過襄王之高  
臺瑤琴自鳴羅帟齊開馬蕭蕭而嘶起鴻噉噉以翔  
迴使崩雲駭浪振蕩於白日兮忽欲去而徘徊客有  
懷鄉失職而對此者恨盈襟而難裁但欲變天地之  
搖落不知感節序之摧頹秋風生歸去來

涼州詞二首

蓬婆城下淨無花條條黃雲漠漠沙卷葉誰將番曲  
奏白頭都護亦思家

關外垂楊早換秋行人落日旆悠悠隴山高處愁西



望只有黃河入海流

虞美人曲

明月帳中泣悲風管外歌  
彷徨夜驚起何事楚人多  
迴燈擁綠髻向劍蹙青蛾  
效命自無恨君王其柰何

築城詞

去年築城卒霜壓城下骨  
今年築城人汗灑城下塵  
大家舉杵莫住手城高不用官軍守

永嘉行

帝衣濺血忠臣死五部初興屠各子  
宣陽門外曉吹笳  
持戟誰爲衛宮士滿城草綠胡馬嘶  
內家散作軍

中妻六璽相隨渡河去月明歸夢遂成迷  
萬里中原非典午至今人說王夷甫

神女宛轉歌二

駐君舟相見盡綢繆已遣大姬傾鑿落  
復令小婢進瑩篋歌宛轉宛轉意何長  
願爲灰與火同泛玉爐香  
解妾珮相貽慰離業愁逐朝霞天際生  
懽隨秋水江頭逝歌宛轉宛轉情相續  
願爲弦與軫共奏瑤琴曲

東門行

出東門暮歸來入室四壁空  
突中無煙甑生埃弱妻蓬頭稚子瘦  
使我心下忽有哀安能學東方生空抱



國士才身長七尺齒編貝索米不得取笑哈鷄鳴東  
門早欲開仗劍當遠去不乘駟馬不復迴妻前挽衣  
言君可棄妾柰此呱呱孩君莫憂無糧田中已生稗  
君莫憂無裳機中布成尚可裁不須苦慕富貴富貴  
多有害蓄賤妾與君生同居死即共作山下灰吾欲  
行爲徘徊仰視蒼天重咄哉

高太史大全集卷之二

吳郡高啓季迪著

南川徐庸用理編

樂府

秦箏曲

嬌絃細語發研羅臂動玉釧鳴相和闌雲隴月愁思  
多愁思多聽此曲停蜀琴罷燕筵

從軍行

關中惡少年占募去防邊匈奴入寇塞將軍下自天  
揚旌三道出列格五營連龍城望兵氣馬邑斷人煙



星攢烽夜舉月偃陣朝圓渴飲踈勒水飢殮屬國羶  
名勇單于憚功多天子憐寧令寶車騎獨擅勒燕然

大梁行

大梁四面平如砥西去咸陽一千里魏王此地昔爲  
都宮闕中天碧雲起車聲鞦韆夜未休帶甲十萬名  
蒼頭撞鐘列鼎宴上客奉金走幣連諸侯信陵真是  
賢公子富貴不驕天下士已訪侯嬴到里門復迎朱  
亥經屠市傾身折節世莫同緩急竟賴斯人功邯鄲  
秦軍一推破七國震動聞英風古城重過爲搔首幾  
度秋風落揚柳沼上應無鳴鴈來苑中只有狐狸走

立馬塵沙日欲昏悲歌感慨向夷門豪華多少同銷  
歇獨有高名今尚存

東飛伯勞歌

前飛蜻蛙後飛蝶桃葉楊枝每相接誰家季女弄春  
妍披煙暎日窓戶前金雀雙釵翠羽扇纈屏翻帳文  
羅薦嬌羞年幾十五多將星復隱奈愁何流暉倏沒  
百花暝空持可憐誰作並

春江花月夜

皓月金波滿奇花玉樹新浮輝與流艷併弄一江春  
還持誰可比結綺閣中人



踏歌行

香塵和露踏成泥花下風寒鬢脚低夜靜高樓有人  
聽起頭一句唱教齊

子夜四時歌

白白復朱朱芳條冒綉襦摘來隨女伴賽鬪不曾輸  
紅粧何草草晚出南湖道不忍便回舟荷花似即好  
堂上織流黃堂前看月光羞見天孫度低頭入洞房  
空幃擁爐坐夜冷微紅滅即意似殘灰無因得重熱

迎送神曲

薦芳兮奠醑斷水爲梁兮葺荷以爲宇神不來兮孰

與處空山愀兮暮多雨渺吾望兮瀟湘雲冥冥兮水  
茫茫有美人兮在堂盍歸來兮故鄉

導赤鯉兮從玄鼉冷風回兮水驚波儼靈旗兮來下  
巫撫節兮安歌安歌兮未急倏迴輶兮山之側南有  
淵兮北有淋神不留兮我心憂願歲來兮惠我秋

有所思

有所思今安在煙霞迢迢隔南海昔年遺我翡翠裘  
篋中久閉銷光彩宛如神仙在瀛洲乘濤欲至風引  
舟同心之人乃離阻嗟我處此將何求

吁嗟篇



惻惻抱深隱靡靡踰崇丘凜凜歲欲徂役後車未休  
不辭車未休但傷歲莫留窮陰蔽九野徒旅同時憂  
豺虎當路啼猿猴出林遊我飢靈作糧我寒又無裘  
徒思陽春日誰送羲和鞭天時自有常淚下還復收

擊筑吟贈張贊軍

擊筑上君堂君心不可忘哀聲流易水憤氣激咸陽  
不向諸侯座寧來刺客場今朝持前奏爲我一停觴

苦哉遠征人

悠悠荷戈子謫發事遠征遠征無窮期千里萬里程  
瞻斗知鄉遠覓物悞歲更霜露鏢飢膚弊鎧蟻虱生

况茲三邊膚驕黠未易平聞笳已心摧赴刃仍骨驚  
軍興有嚴誅賤命顧自輕區區在行間敢望竹帛名  
柰何久不還主將功未成誰怜城南室思婦感鵲聲

愛妾換馬曲

出帷掩紅袂離廐結青絲我取躡雲足君憐羞月姿  
惟當樹功業詎必戀恩私回首各已遠春山將暮時

美人磨鏡詞

匣中舊鏡龍蟠背昏盡如同月逢晦尋得街頭負局  
翁粉鉛和汞拭青銅須臾瑩徹無纖翳試整朝來暗  
梳髻光明還在只如新悔向塵埃久相棄明日照儂



自畫眉不須問即宜不宜

朝鮮兒歌

朝鮮兒髮綠初剪齊雙眉  
步窈夜出對歌舞木綿裘  
軟銅鑲垂輕身回旋細喉轉  
蕩月搔花醉中見夷語  
何須問譯人深情知訴離  
鄉怨曲終拳足拜客前  
烏啼井樹蠟燈然共訝玄菟  
隔雲海兒今到此是何緣  
主人爲言魯遠使萬里好風  
三日至鹿走荒宮亂寇  
過鷄鳴廢館行人次四月王  
城麥熟稀兒行道路兩  
啼飢黃金擲買傾裝得白飲  
分塗趁船歸我憶東藩  
內臣日納女椒房被褱翟教  
坊此曲亦應傳特奉宸

遊樂朝又中國年來亂未鋤  
頻令貢使入朝無儲皇  
尚說屈靈武丞相方謀卜  
許都金水河邊幾株柳  
依舊春風無恙否小臣撫事  
憶昇平尊前淚瀉多於酒

野老行

乘扈初鳴麥花落大家小家  
蚕滿箔村中無吏夜捉  
人老身醉歸行失脚自從  
明府一下車短衣糲飯即  
有餘姓名免籍考弩手新  
婦辟纊兒讀書縣門前頭  
柳飛絮春風又隨官馬去  
鷄鳴相送拜道邊  
願公受取一大錢

秋江曲送顧使君



秋江月滿秋潮大江上行人待潮過別離休說渡江  
難半日順風船穩坐楚江茫茫葭平使君來時雉  
雉鳴子弟從軍隔江去幾家猶住夕陽城水田雖荒  
飯常足芡米夜春二十斛誰道繁華不及前戶無征  
稅官無獄渡江渡江君莫留江北樂似江南秋

湖州歌送陳太守

草茫茫水汨汨上田蕪下田沒中田有麥牛尾稀種  
成未足輸官物戾來乘下搖玉珂聽儂試唱湖州歌  
湖州歌悄終闕幾家愁苦荒村月

鑿渠謠

鑿渠深一十尋鑿渠廣八十丈鑿渠未苦莫嗟吁黃  
河曾開千丈餘君不見賈尚書

荆門壯士歌

水洶洶水差差荆門葉黃杪秋時上有騰攫之猿猱  
下有饒嚼之蛟螭悲哉此路難孰敢徑渡之三撫髀  
壯士起劍風騷勞笑上指仰天長歌不見星哀鴻文  
叫雲冥冥

城虎詞

候潮門開啼早鴉忽入居人家母兒畏窺鷄犬  
伏排籬突戶誰能遮猥風動樹初哮乳驚起東營捉



生手怒拔長戈試一春光落地佺魂走南山藜藿  
深冥冥白日橫行誰敢櫻胡爲離窟未城市牙爪雖  
全不能恃君不見壯士遭急縛失路窮時亦如此

寒夜吟

月下凍痕生綠井隔簾霜片飛無影樹枝風息轉迎  
寒愁人如鳥棲未安夜短夜長應獨覺熒熒殘燭鳴  
鳴角

戍婦詞

妾在當奉姑卽行當報君男女各有役死生從此分

羈旅行

馬頭北風吹地白手冷時驚墮鞭索隻喉欲來雙喉  
過客程不盡關山多狐狸縱橫古城壞旗折官亭無  
酒賣土風處處殊故園鄉音只聞僮僕言天涯歲晚  
無相識囊金已空歸不得瞋技人家自炊黍土屋青  
燈鴈啼雨此時暫解羈旅憂夢與家人夜深語人生  
出門卽苦辛何况長爲萬里身遠遊總得功名好不  
如貧賤鄉中老

少長干曲

卽採菱葉尖妾采荷葉圓石城愁日暮各自撥歸船

春江行



春江南北疑無岬綠草綠波連不斷一女紅粧出浣  
紗恰如鏡裏見桃花袂衣猶冷過寒食雲度春陰半  
江黑浦口風多潮正深輕舟搖蕩似人心鷓鴣暮啼  
歸路遠飛絮茫茫楚王苑

寄衣曲二首

即寒甚妾寒持衣向燈泣不是手縫遲綿多針線澁  
賜袍非不暖妾製祿即身寄去龍堆遠端愁到已春

發宅行

鳴珂坊裏將軍第列戟齊收朱戶閉里媪逢人說舊  
時有廬被奪廣園池今年沒入官為主散盡堂中義

宅兒厨煙久斷無梁肉群鼠飢來入隣屋官封未與  
別人屋日日閑苔雨添綠曲閣深沉接後房畫屏生  
色暗無光尋常不敢偷窺處守卒時來拾墜璫春風  
多少奇花樹又有豪家移得去

青樓怨

浴金熏爐鏤玉奩蘭香今夜為君添烏棲黃昏烏起  
曙曉見道來還道去

聞角吟

驚起黃榆塞下鴻一聲鳴軋戍樓空此時吹動關山  
意十萬征人歸夢中玉帳尋弓夜初起月白不知霜



似水餘聲散作滿天愁風吹不入單于壘

刺促行

刺促復刺促天高白日速黃鵠長苦飢烏鳶飛食肉  
促刺復促刺長途多荆棘但見今人行不見古人跡

牧牛詞

尔牛角彎環我牛尾秃速共拈短笛與長鞭南隴東  
岡去相逐日斜草遠牛行遲牛勞牛飢唯我知牛上  
唱歌牛下坐夜歸還向牛邊卧長年牧牛百不憂但  
恐輸租賣我牛

捕魚詞

後網初沉前網起夫婦生來業洵水忽驚網重力難  
牽打得長魚滿船喜不教持賣去南津且向江頭祭  
水神頭得年年神作主無事全家卧煙雨不論城中  
魚貴賤換得酒歸儂不然

養蠶詞

東家西家罷來往晴日深窓風雨響二眠蚕起食葉  
多陌頭桑樹空枝柯新婦守箔女執筐頭髮不梳一  
月忙三姑祭後今年好滿簇如雲蛋成早蒼前繰車  
急作絲又是夏稅相催時

射鴨詞



射鴨去清江，曙射鴨，返回塘。晚秋菱葉爛，煙雨晴鴨，羣未下媒。先鳴草翳，低遮竹弓，殼水冷田空。鴨多瘦，行舟莫來，使鴨驚得，食忘猜。正相聞，鶯啞啞，毛襪襪，潛機一發，那得知。

伐木詞

竹檐挑多兩，有赤礪斧，時尋澗邊石。老夫氣力秋漸衰，易斫喜有枯林枝。白雲無人暗空谷，遠聲丁丁如啄木。暮歸待伴不獨行，前途虎多荆棘，生長年不曾到城府。聞此山中，路尤阻。

打麥詞

雉雞高飛，夏風暖，行割黃雲，隨手斷踈莖。短若牛尾垂去冬，無雪不相宜。塲頭負歸日，色白穗落連枷聲。拍拍呼兒打，曬當及晴雨來，怕有飛蛾生。卧驅鳥爵，非愛惜，明年好收，從尔食。

采茶詞

雷過溪山碧，雲暖幽麓半吐鎗。旗短銀釵，女兒相應歌筐中，摘得誰最多。歸來清香猶在手，高品先將呈太守。竹爐新焙未得嘗，籠盛販與湖南商。山家不解種禾黍，衣食年年在春雨。

賣花詞



綠盆小樹枝枝好花比人家別開早陌頭擔得春風  
行美人出簾聞叫聲移去莫愁花不活賣與還傳種  
花訣餘香滿路日暮歸猶有蜂蝶相隨飛買花朱門  
幾迴改不如檐上花長在

洞房曲

洞房香吐合昏花月轉勾闌啼乳鴉今宵有酒留君  
醉不信娼家勝妾家

待月詞

漏板敲愁夜驚玲露井桃花濕無影海風吹星銷碧  
煙弄妃粧遲鏡未懸素鸞不來桂香死雲外紫篁呼

夢起瓊樓欲開天半紅徘徊望拜娥池東蘭閨未返  
燈寒後恰似前宵待郎久

惜花歎

惜花不是愛花嬌願得花開伴寂寥樹樹長懸鈴索  
護籠籠頻引鹿盧澆幾回欲折花枝喚心恐花傷復  
停手每來花下每題詩不到花前不持酒準擬看花  
直盡春春今未盡已愁人縷留片萼依前砌全落千  
英過別隣懊惱園中妬花女畫牆不禁狂風雨流水  
殘香一夜空黃鸝魂斷無言語縱有星星在蘚衣拾  
來已覺損光輝只應獨背東窓臥夢裏相隨高下飛



照鏡詞

君家青銅鏡價重比黃金空持照人面不持照人心

田家行

草茫茫水汨汨上田蕪下田沒中田有禾穗不長狼藉只供鳧鴈糧雨中摘歸半生濕斷婦春炊兒夜泣

憶遠曲

揚子津頭風色起卽帆一開三百里江橋水柵多酒  
罈女兒解歌山鷓鴣武昌西上巴陵道聞卽處處經  
過好櫻桃熟時卽不歸客中誰爲縫春衣陌頭空問  
琵琶下欲歸不歸在卽足卽心重利輕風波在家日

少行路多妾今能使烏頭白不能使卽休作客

金井怨

照水羞見影及水嫌手冷閑立梧桐陰烏啼秋夜永

送客曲

送客車在門勸客杯在手明日長安花今夜宜城酒  
願客飲此勿復辭我無黃金爲客壽人生無處無弟  
兄鄉里刺促誰知各賣書買得百金劍有身須向關  
山行馬四蹄車兩轂行人欲發休躑躅嗶嗶鷄鳴赤  
日旭

里巫行



里人有病不飲藥神君一來疫鬼却走迎老巫夜降  
神白羊赤鯉縱橫陳男女殷勤案前拜家貧無肴神  
勿怪老巫擊鼓舞且講紙錢索索陰風多巫言汝壽  
當止此神念汝虔賒汝死送神上馬巫出門家人登  
屋啼招魂

主客行

主人楚歌客楚舞落日黃雲雁聲苦笑拂腰間寶劍  
光美人滿堂色如土太兒北海人中竒小兒能讀曹  
娥碑相逢且莫歎貧賤但願有酒無別離君不見平  
原墓上生秋草國士無窮道傍老

春夜詞

杏煙濕髮秋千下銀蟾光寒曲屏盡數漏間過每睡  
時月明微見墮遊絲欲歸自踏娉婷影風動玉釵花  
亦冷屋貯嬌愁鎖幔紗青然嘶騎醉誰家管弦不動  
空臺榭夢與烏衣語中夜

新絃曲

舊絃解新弦張冰絲牽愁六尺長寬急頻從指邊聽  
金鴈參差移不定新絃響高調勿促不如舊絃彈已  
熟憐新厭舊妾恨深爲君試奏白頭吟他日愁如舊  
絃棄泣向羅裙帶頭繫



竹枝歌六首

蜀山消雪蜀江深  
郎來妾去聞歌吟  
峽中自古多情地  
楚王神女在山陰

魚復浦上石纍纍  
恰似儂心魚轉迴  
船歸莫道上灘  
惡自牽百丈取郎來

江水出峽過夔州  
長流直到海東頭  
郎行若有思家日  
應教江水復西流

躑躅花紅鴨鳩飛  
黃牛廟下見郎稀  
大編攤錢賣藍  
去短釵簪葉負薪歸

妾愛看花下渚宮  
郎思沽酒醉臨邛  
春衣朱織機中

錦只是長絲那得縫

楓林樹樹有殘啼  
若箇聽來不悵悵  
今夜郎舟宿何處  
巴東不在定巴西

轉應詞三首

雙燕雙燕去歲今年相見  
往來東舍西家  
啣得泥中  
落花花落人在暮  
寒池閣

踈雨踈雨綠蒲靡  
蕪洲渚江南相憶  
故人遠水遙山  
暮春春暮春暮春風急  
盡船難渡

五雜組二首

五雜組駝背羈  
往復還渡口  
船不獲已非少年



五雜組錦綉旗往復還更戍兒不獲已遭亂離

五噫歌 弟梁伯鸞墓

顧瞻亭皋兮噫丘墳有蒿兮噫鸞春亦勞兮噫危邦  
可逃兮噫先生何兮噫

疊韻吳宮詞

筵前憐嬋娟醉媚睡翠被精兵驚升城棄避愧墜淚  
鶴媒歌

鶴媒獨步荒陂水仰望雲間飛不起遠看過鳥下南  
汀鼓翼相迎似相喜共爲羽族生水鄉暫從飲啄無  
猜防草看俄開中潛弩弋師謹咲媒矜舞嗟爾高潔

非九禽胡爲狗食移此心受人馴養志遠舉好陷同  
類機腸深嗚呼世間幾人跡君子得利相傾亦如此

牛宮詞

豕豢于苙鷄棲于埒嗟爾鳥捷何所止斯歲聿云暮  
兩霜以風乃築環堵以爲爾宮既用爾力宜恤爾寒  
庇處密固我心孔安

照田蠶詞

東村西村作除夕高炬千竿照田禾老人笑祝小兒  
歌頌得宜蚕又宜麥明星影亂棲鳥驚火光辟寒春  
已生夜深然罷歸白屋共說豐年真可卜



琴操

風樹操

予自傷早失恃怙而作

朝風之飄飄兮維樹之推搖兮吾思親之翹翹兮  
夕風之烈烈兮維樹之揭揭兮吾思親之憊憊兮樹之  
有風猶可息兮吾之無親終不可復得兮

之荆操

余思秦伯之德而作

粵我有土岐山之下孰是營之維我考祖今我于邁  
自岐徂荆豈不懷歸念我弟兄民勿我思我斯安只  
國已有后先君季子

登丘操

登青丘有懷而作

驅車兮與馬蹇君行兮胡為乎在中野登彼兮崇丘  
下茫兮兮九州思君子兮不得與駕以遊山有出雲  
兮木亦有柯我將歸兮憂之如何

望歸操

哀周復子死於虎而作

兕旦而出于山之麓兮兕夕不歸在席之腹兮我往  
無所榛蒙籠被谷兮嗟爾耽耽弗食我豕犢兮穴亦  
有子胡寧使我獨兮

辭

望虞山辭

虞山峩峩兮出雲油油胡歛其施兮弗雨九州下有



蛟龍兮海波橫流誰使子來兮從伯氏以游朝于濟  
兮望岐周國有祀兮有何求唐虞逝兮道阻脩漸德  
輿兮干戈日休我思夫人兮心焉孔憂

放鶴辭

登支遁放鶴亭而作

放鶴去當高飛啄莫爭鷄鷺食遊莫近虞羅機雲山  
海嶠堪來往明月千秋待爾歸

吊伍子胥辭

覽勾吳之故墟兮灌莽薈其籠獲館娃廢而為沼兮  
歸伍胥之遺宮矣千祀而勿毀兮繫若人之死忠昔  
窮逋而渡江兮奮孤跡於羈旅既入郢而雪耻兮又

棲越而攘侮使彼吳之強大兮非夫子而孰為何夫  
差之自喜兮遽忽戒而荒娛陳昌言之惻歎兮寔不  
忍視國之阽危衆以子為巨信兮肆詭辭之詆欺夫  
豈不能全身遠適以自庇兮顧先王之舊德卒待隕  
而何言兮恨終不能寤君之嬖惑載鳴夷兮浮游魂  
惇惇兮在中流江神念子兮哀憤鼓洪濤於高秋嗟  
君子之出輔兮孰不願為伊臯使言從而志行兮致  
雍熙之陶陶何齟齬而多患兮惟重華之不可以屢  
遭鄂侯諍而就醢兮龍逢諫而見屠蓋自古而有之  
兮匪夫子獨罹乎此辜身雖歿而義安兮又舍是將



馬索彼循然而苟容兮寧獲免乎此額想子猶念夫  
故都兮或乘雲而來歸顧荆棘之多露兮應攬涕而  
歎歎余亦何爲而感慨兮懼直道之墜也聊陳詞而  
表烈兮亦邦人之志也

三言

梧桐園

桐花香桐葉冷生宮園覆宮井雨滴夜風驚秋鳳不  
來君王愁

三四言

王伯敬歌

舟初維琴始薦驛亭邊夜相見譎宛轉情綢繆解環  
珮彈箜篌詩易闌情難歇江波寒墮明月綠壺再傾  
芳音欲遠譬彼林鳥逢晨各飛羅衣沾霜城鳥忽起  
明日相思孤棹千里



高太史大全集卷之三

吳郡高啓季迪著

南州徐庸用理編

五言古詩

擬古十二首

其一

慕慕墻下李  
茫茫陂中麥  
浩浩望遠塗  
悠悠思行客  
客行歲已盈  
紆鬱傷我情  
始知失群鴻  
不若求友鶯  
登山知天高  
臨流識川阻  
不遣懷同心  
那知別離苦  
別離不可久  
寂寞不可守  
自傷紅顏子  
相思成皓首



朝日如不晚行人會當返

其二

嵯峨雲間樓俯視層城陰綺戶相洞開清飈拂羅襟  
上有離屋婦哀歌撫絃琴不知中怨誰掩仰一何深  
初為郢中唱再奏邯鄲吟不惜努力歌寫作絕代音  
風吹落君耳萬里知愁心曲盡思寐寥青天日西沉  
安得化彩鳳飛去巫山岑

其三

出郭見丘墓纍纍滿山阿四海能幾人逝者何其多  
封樹日蕭條狐狸走逢科英靈無人弔牧兒暮來歌

浮華一壺中倏若飛鳥過生時不肯飲死沒將如何

其四

離離白雲翔悠悠清川逝天地如傳郵閩人以為世  
良時難再得游樂咸陽中咸陽名都會衣冠集王公  
南山對魏闕嘉樹何龍葱九衢十二城逶迤迥相通  
衛霍開上第車馬爭春風娛意勿自惜當至百年終

其五

東井不可飲威弧孰能張虛名竟何用千古同悲傷  
與君初結歡金石比中腸恩情忽乖分相望阻川梁  
閨門尚難越况彼道路長不如雲中鴈迴飛自隨陽



其六

促織何嘖嘖空庭寒露白蘭蕙辭故芳高梧銷華澤  
閨中覽物變感歎當此文引領望遠人天河西南隔  
舟行詎離水針運恒依石君雖有棄捐妾心誓無易

其七

置酒北堂上歡言宴佳賓佳賓復爲誰相遇盡朱輪  
中庖炙肥牛登俎悉異珍左右燕趙姝羅綺驕上春  
清謳雜哀吹響激迴高旻主勸客復酬中抱各以伸  
盛年易傾謝爲樂頌及辰請看舊同遊半作泉下人  
無爲苦刺促長憂賤與貧

其八

美人一相見遺我白玉環上有雙雕龍遊戲在雲間  
持此感深意佩結無時閒玉以比貞潔環以明不絕  
雲龍永相從誰能使離別

其九

秋至衆芳歇芙蓉獨鮮妍朱華照綠水日暮涼風前  
采折難遠贈相看自嬋娟孤艷豈足賞後凋良可憐

其十

明星爛東方北斗亦已旋獨宿悲夜徂空床藉蘭荃  
鷄鳴整環珮思奉君子逵君子行未歸新粧爲誰妍



意踈覺去遙，只尺越與燕。含情乏彤管，何以寫中情。  
君如縵上瓶，妾若井底泉。不垂汲引惠，澄瑩徒終年。

其十一

人生一漚水，所欲乃無涯。志意若未畢，容華忽然衰。  
天地有終壞，誰能待其期。聊爲一日歡，勿作千載悲。  
神仙俱好飲，得醉復何疑。

其十二

黃鳥鳴春陽，流芳滿西園。攀條日已暮，悵惋不能言。  
禦寒必重裘，涉道須雙轆。離羣非君子，何以解憂煩。  
煩憂日已積，佳期日已失。思君如蓬萊，可望不可即。

區區儻見察，憔悴甘自畢。

寓感二十首

其一

天旋海水運，日月馳奔輝。不知此往來，伊誰幹其機。  
諒由任元氣，推遷不能違。人生處宇內，行止無定依。  
唯當乘大化，逍遙隨所歸。

其二

鷄鳴一警旦，陽鳥已東升。群動紛自起，各欲赴其生。  
飢燬土中出，棲禽林外驚。蒼蠅一何微，翔翬亦飛鳴。  
人生信多故，安得免營營。



其三

盛衰迭乘運天道果誰親自古爭中原白骨遍荆榛  
乾坤動殺機流禍及蒸民生聚亦已艱一朝忽胥論  
陽和既代序嚴霜變肅晨大運有自然彼蒼非不仁  
咄咄堪嘆嗟滄溟亦沙塵

其四

美女生貧家光艷人未識遠聘入楚宮揚蛾欲傾國  
朝遊瓊臺上文侍金輿側奉歡擬千齡秋風失顏色  
銜恩歸永巷貞意徒寐默高高天上星墮作水底石  
人事盡如斯推移歎何極

其五

龍蘭生路隅馥馥有奇香路隅多行人采掇成摧傷  
深林雖幽獨秋至靄餘芳托根在得所君子踏其常

其六

蚩蚩此群氓幾人出其儔誰云挹智慮乃足資勞憂  
晨秣思遠聘宵披務窮搜懷古復慨今百念紛相投  
膠擾得喪間若與方寸仇安知廣成子冥卧昆侖丘  
無營亦無想八表獨神遊

其七

大道本夷直末路生險巇盃酒出肺肝須臾起相疑



田蚡排竇英趙高誣李斯傾擠不少假權寵實蓄基  
鑿井當得泉種桑會成絲禍福皆自致天道信難欺  
出亡無所舍千載使人悲

其八

志士徇功業貪夫詫輕肥亦有逃群子矯矯與時違  
彼此更共笑不知誰是非達人體自然出處兩忘機  
浮雲遊天表舒卷有餘揮

其九

攬轡登大行遙望洛北州嶠函正西峙黃河復東流  
百城無遺堵雲煙莽相繆朝作冠蓋場莫為狐兔立

昔人爭此地干戈迭相讎當其得意時連陌擁鳴騶  
百年奄忽盡魂魄空來游局見采芝叟冥栖無所求

其十

桃李初不語鳳凰豈長喧末俗矜辯議窮口禍之源  
所以國武子殺身由盡言妙哉無為謂默默道斯存

其十一

人言異草木不着松柏壽欲於百年間辛苦畝不朽  
形質天所界名姓吾自取形名兩未立誰我竟何有  
不能知吾先奚暇恤我後遺臭與流芳冥然付杯酒

其十二



短褐乘輦輅孤裘駕文車西門與北宮窮達一何殊  
彼達矜已智此窮愧身愚東郭發至言兩惑各以祛  
厚薄有定命巧拙果誰歎歸卧掩蓬室道存何所吁

其十三

驚馬放田野志本在豐草偶遇執策人驅上千里道  
顧非乘黃姿豈足辱君早負重力不任哀鳴望穹昊  
柰何相逢者猶羨羈絡好

其十四

頽陽在川上玄蟬夕鳴悲嫋嫋風起波翻翻葉辭枝  
曠望天宇內沉寥此何時朱火已盈謝清商屆其期

覽鏡忽自嗟綠髮生素絲萬物有榮悴造化豈吾私

其十五

躑躅遠遊子驅車上高山高山多隴坂悲哉路何難  
其顛摩蒼穹欲上不可攀日暮牛力疲前征未能閑  
雙輪忽中摧一墮深谷間引領望黃鵠失路何當還

其十六

蜀琴有奇紋本是枯桐枝一彈舞鸞鶴再彈下靈祇  
曾持薦皇帝雲中奏咸池棄置之不調流塵被朱絲  
終焉含妙響未始有成虧

其十七



達人貴全生外物等秋草顧此七尺軀即爲萬金寶  
昧者營所嗜棄捐不待老豈無室中資它人是來保  
何如鉅金液長令髮顏好

其十八

千秋取丞相一語悟君衷長孺多謹言白頭擯屋東  
人命有通塞主聽無遠從失如魚去波得若雲遇龍  
會合感冥相佳期諒難逢下生未聞道無事淨沾胸

其十九

南山多浮雲北山有高樹因風暫來依風回復飛去  
兄弟滿四海幾人此相遇握手交百歡分襟滋千慮

踪跡不可當無爲嗟去住

其二十

鴻鵠橫四海鷓鴣戀蓬榛長松凌風煙小草亦自春  
各稟造化育道遙適其真無將赫赫者下比棲棲人

詠隱逸十六首

向長

子平謝累辟雅志在隱居家貧或有饋取足反其餘  
讀易深自悟謂賤貴不如敎言嫁娶畢家事無閑余  
同好有禽生肆意相與娛茫茫五岳去孰得回其車

周黨



世祖初厭武開觀在東都使者遍岩藪旌帛召賢儒  
伯况亦暫起縉頭詣尚書引見伏自陳始願不敢渝  
周興有耻食堯禪或羞汙士固有本志聖主焉能拘  
范生乃見毀咄爾何其愚

王羈

儒仲有清節始一應徵命造化抗高辞不肯臣萬乘  
歸來自耕野蓬藿掩門逕翩翩故人子相過容服盛  
一念見曹羞容去卧如病賴有賢婦言不失初守正  
嘉遜遂終身清輝兩相暎

梁鴻

伯鸞古賢人乃在杵臼間夫婦共守志逃名入深山  
淒涼五噫歌東出過帝閔齊魯復荆吳長往遂不還  
爲傭豈無勞顧已少外患終葬烈士旁高風邈誰攀

法真

高卿閔西儒好學賤榮祿閉門不交世弟子相誦讀  
太守者何人欲以吏見錄誓在南山南胡肯勞案牘  
連徵終不就皦皦離垢俗郭子有頌詞玄德久愈暴

韓康

伯休始賣藥志將晦當時如何不二名乃爲女子知  
玄纁強見聘使至焉得辭凌晨自先發不駕安車馳



亭長遠迎候未識徵君誰脩道奪其牛解與不復疑  
中途遂長遁踪跡竟莫追乃知超雲驥塵轡何由羈

陳留老父

漢衰黨獄起朝柄在刑餘皇皇外黃令去官返鄉閭  
班草逢故人涕泣語路隅邦危德無援忠良恐遭誅  
有叟過其傍值杖爲踟躕贖之歎且言何悲二大夫  
鸞鳳不隱利安能免置旱欲問不肯顧飄然邁長途  
賢哉此老翁嗟嗟乃誰歟

龐公

南陽有龍鳳乘時各飛翮鴻鵠獨深棲不肯居籠樊

皤皤隴上耕遠辱刺史軒豈不念子孫遺安乃名言  
采藥不復返亭亭空鹿門

王績

無功始亦仕季代蓬亂屯投劾乃徑歸不作嬰網鱗  
結廬河渚北喜與瘖士隣相逢雖多言不若無語貞  
種黍養鳧雁道遙度秋春乘牛過酒家留連或經旬  
嗜飲豈沉湎醉鄉可逃身北門與樂署暫屈誠此因  
賢哉焦史妻相饋不厭勤酣歌自遺世稽阮其能倫

朱桃椎

祭酒絕俗者曳索復被裘自匿林莽間不入城都遊



織屨易米若於人又何求  
惔惔高長史延見禮甚脩  
瞪視雖不言默教意已周  
欲使如曹叅無事治一州  
忽去返山谷避獲安可留

武攸緒

孽后移寶鼎同姓咸析珪  
獨去謝親寵龍門事宜棲  
澹泊如素嘗衣褐履茹藜  
賜器不肯御床頭委塵泥  
族人豈不華回首已粉齏  
苟榮禍必集達識乃弗迷  
蟬蛻衆濁中名與嵩高齊

盧鴻

顛然守秦一高卧在幽壤  
開元始求治賢哲勞夢想

詔書起岩扃宸意勤挹仰入京遽還山孰得縻以軼  
天子遂其高營室致安養爵祿不可加貪士應泚頽

秦系

公緒避時亂不駕戎府車  
南安大松間卜築聊可居  
穴石爲巨硯坐衍老氏書  
刺史致羊酒歲時造其廬  
不拒亦不謝偃息每自如  
懷道誠可稱工詩乃其餘

陸龜蒙

魯望好任散心與太古期  
俗夫晨叩門不肯一見之  
下田與江通終歲恒苦飢  
菘刺不告勞常師禹胼胝  
酒酣發長歌猶有憤亂悲  
寧不念枯槁行哉豈期時



漢濱老父

漢濱有老翁初不語鄉里天子雲夢遊盼望臨污水  
居人悉縱觀翁獨耕不已即官下道問荅言野人耳  
借問世立君豈將使爲理柰何從遊俠勞人奉諸已  
尚忍令人觀吾實爲子耻忽如驚鴻騫孰能躡其軌  
名姓且莫知超哉隱君子

張志和

超超玄真子游浪煙水中敝舟以爲家來往無定踪  
自言處大虛四海長相從奴婢兩夫婦耕織粗可供  
天子不得見丹青繪其容漁歌復識聞山水邈其重

吳越紀遊十五首

始發南門晚行道中

歲暮寒亦行征人有常期辭我家鄉樂適彼道路危  
酒闌別賓親驅車出郊岐我馬力未痛已越山與陂  
回頭望高城落日雲樹滋遭亂既少安謀生復多飢  
途逢往來人孰不爲此馳遠遊亦吾志去矣何勞悲  
渡浙江宿西興民家

掛帆無天風到岬日已夕捨舟理輕裝欲問古鎮驛  
颯颯灘聲迴莽莽山氣積僕夫夜畏虎告我勿遠適  
望林投人家炊黍旋敲石寒眠多虛警我體若畏席



誰云別家遙數日已在客今宵始驚歎東西大江隔  
早過蕭山歷白鶴柯亭諸郵

客起何失早村荒絕鷄鳴况時江雨晦不得見啓明  
凌兢度高関山空縣無城隔林聞人呼已有先我行  
側身避徑滑聚足防厓傾衣寒復多風淅淅遠水聲  
千峰霧中過不識狀與名巖開見前郵始覺歷數程  
越禽啼楓篁冷日傍午晴煙生沙墟窳葉落澗寺清  
登臨亦可悅但恨時非平

次錢清謁劉寵廟

亭亭樹閣祠落日小江口停舟拜孤像開幔蒼鼠走

憶公治邗時德感山谷叟臨行謝其饋清風在茲久  
我方東征急不得奠杯酒惆悵出烟扉殘村夜聞狗

登蓬萊閣望雲門秦望諸山

旅思曠然釋置身蒼林杪群山為誰來歷歷散清曉  
竒姿脫霧雨奮首爭欲矯氣通海煙長色帶州郭小  
曲疑藏啼猿橫恐截歸鳥流暉互蕩激下有湖壑繞  
佳處未過經一覽心頗了秦皇遺跡浪晉士流風香  
願探金匱篇振袂翔塵表

聞長鎗兵至出越城夜投龕山

列藩過戎亂駐鉞實此州如何殺大將王師自相讎



我來亂始定城郭氣尚愁又聞有隣兵倉卒豈敢留  
促還出西門天寒絕行輶古戍暗雨雪旌旗暮悠悠  
野屋閉不守澤田棄誰收屋久且奔逃游子安得休  
逶迤蒼山去泱泱玄雲浮人帝爭夜行風榛嘯岩幽  
我徒戒相親一失未易求飢拾谷口粟寒燒澗中樵  
神迷路多迂再宿達海陬雜嘗登頓勞幸免迫辱憂  
聖尼畏於匡嗟我敢有尤但慙去越早不遂名山遊

夜抵江上候船至曉始行

夜舛西陵館霜谷猿叫歇津卒未具舟天險不可越  
漁商雜候渡寒立沙上月蒼煙隱遙汀益覺潮漲澗

開橈散鷺鳧海色曙初發矐矐前山來稍稍後嶺沒  
中流聞鼓角隔岬見城闕客路得竒觀臨風罔俱豁

登鳳凰山尋故宮遺跡

茲山勢將飛宮殿壓其上江潮正東來朝夕似奔響  
當時結構意欲敵汴都壯我來百年後紫氣愁不玉  
烏啼壁門空落葉滿陰障風悲度遺樂樹古羅嚴伏  
行人悼降王故老怨姪相蒼天何悠悠未得問興喪  
世運今徒衰淒涼一回望

宿湯氏江樓夜

舟師夜驚呼隔浦亂燈集潮聲若萬騎怒奪海門入



初來聽猶遠忽過顧無及震摧高山動噴灑明月濕  
霜風助翻江蛟龍苦難螫應知陰陽氣來往此呼吸  
登樓覺神壯憑險方迥立何處望靈旗煙中去波急

過奉口戰場

路迴荒山開如出古塞門驚沙四邊起寒日慘欲昏  
上有飢鳶聲下有枯蓬根白骨橫馬前貴賤寧復論  
不知將軍誰此地昔戰奔我欲問路人前行盡空村  
登高望廢壘鬼結愁雲屯當時十萬師覆沒能幾存  
應有獨老翁來此哭子孫年來未休兵強弱事併吞  
功名竟誰成殺人遍乾坤愧無拯亂術佇立空傷魂

泊德清縣前望金鰲玉塵二峰

歸遠行不緩頗失眺山水獨伶茲峰秀欲去舟且樣  
層巒迴長溪日落蒼霧起寒城動遠炊晚渡罷孤市  
豈唯地景幽况乃民俗羨牛羊散樹下曖曖舊墟里  
田腴收穫富縣靜爭訟止畏途遇樂境我意方一喜  
嘯歌逐漁翁暫宿浦煙裏篠疎風備備月偃波瀾瀾  
旅顏在塵中逢人固多耻安得託此君長年息行李  
舟次敢山阻風累日登近岬荒岡僧舍

高岸鳴枯葉湖陰北風厲寒濤洶我前幾日不得濟  
孤舟恐漂蕩石根暮牢繫憂來厭閑卧近寺聊獨詣



雀飢殘林空人倦危磴細年荒無屈僧樹死石門閉  
神傷却欲返微霰洒征袂窮冬已崢嶸故國尚迢遞  
仰看浮雲馳東路阻歸計長歎復何言吾生信多滯

過破石

破石頗奇壯長河出連山絕壁兩岬開行舟過其間  
高處誰解登陰藤叢難攀旁垂雨痕古仰露天光慳  
不知真宰意隨地設險艱一夫據蜀閣二世憑秦關  
賴此非要區爭奪得少閒徘徊佇望久日暮飛雲還

謁雙廟

維昔天寶末君王寵奸虜椎邊委強兵遺患同養席

叛聞遽西幸骨肉棄榛莽河北二十州義士誰禦侮  
兩公起誓眾慟哭告玄祖橫身過其衝江淮保安土  
孤城無全堞百戰霜月苦力窮援不來嚙齒罵益怒  
殘兵日飢疲秋風仆旗鼓男兒不生降一死寇今古  
故鄉有遺廟俗祭巫屢舞冊青網塵中爽氣猶可覩  
嗟今屬喪亂戎馬正旁午臨危肯捐軀如公未多數  
獨立為悲傷斜陽下寒楚

登海昌城樓望海

百川浩皆東元氣流不息混茫自太古於此見容德  
積陰漲玄濤萬里失空色鴻鵠去不窮魚龍變莫測



朝登玄樓望動盪豁胸臆始知滄溟大外絡九州城  
日出水底宮煙生島中國寬疑浸天爛怒欲吹地是  
常時烈風興海若不受職長堤此宵潰頻勞負薪塞  
况今艱危際民若在墊溺有地不可居瀕洞風塵黑  
安得擊水遊圖南附鵬翼

停君白玉卮

停君白玉卮聽我前致辭家本吳門市英風暮要離  
少年貧無行御里不相推喜過毛公舍懶下董子帷  
偶從岬頭侯跨鞍赴邊陲欲邀深入勲終然計無奇  
歸來冠側注始學窺書詩稍通鄒魯生盡謝燕趙兒

焉知事益謬空言竟難施布衣走路傍但爲衆所嗤  
廷中忌賈誼門下誣張儀二子豈不辯未能免詭疑  
嗚呼今之人孰解容不羈我將棄浮名垂釣東海湄  
長笑調魯連高歌酌安期素心儻有合豈要餘子知

讀史

周衰禮樂廢大道成榛菅羸秦任商君王制欲盡剛  
厚賦山澤空亟戰原野殷頽波自茲靡千秋去無還  
誰云重華駕邈矣難仰攀於焉誦其書如造揖讓班  
安得鳳凰鳥飛下浮雲間

雜詩



朝臨高堂上俯仰崇岡下春暉何悠悠清川自東寫  
陽和發卉物時澤均播灑如何及芳辰蕭條俱空野  
願言釋拘局登高聘吾馬曠途不見人憂心何由寫  
興謝固其常吾將允誰者

池上鴈

野性不受畜逍遙戀江渚寔飛昔未高偶爲戈者取  
幸來君園中華沼得遊處雖蒙惠養意飽飼貸庖糞  
終焉懷慙驚不復少容與耿耿宵光遲撼撼寒響聚  
風露秋梵陰孤宿歛殘羽豈無鳧與鷺相顧非舊侶  
朔漠饒燕雲夢澤多楚雨避鄉萬里外哀鳴每延佇

猶懷主恩深未忍輕遠舉儻令寄邊音申報聊自許

題綠綺軒

幽抱時欲寫帷中有鳴弦一彈落一葉庭樹坐蕭然  
寂寂山水夜迢迢河漢天憶聽烏啼起南軒秋未眠

答張山人憲

聽君辛苦詞感我艱難情百年自有爲安用文章名  
鷄鳴海光動車馬塵滿城相逢無新舊言合意自傾  
奉觴置君前長歌發哀聲時手苟未得飲此全其生

澄景閣夜宴

王孫喜留宴開閣望明河是夕月微暈涼風池上多



樓禽翻暗翫，駭魚動圓波。清景厭絲竹，雅咏吞高歌。  
尊酌願勿間，良宵易蹉跎。預憂別在旦，車馬層城阿。

贈馬冠軍

一騎東方來，相逢新豐市。自言讀父書，出身良家子。  
名在俠飛籍，蘭纓懸鹿盧。曾為魏其客，不作平陽奴。  
欲行渡狼河，直擒射鵰將。壯志忽蹉跎，秋風卧孤障。  
解裝出我筑，歌作變徵聲。攄頭落日在，歌罷酒再行。  
相君本鶩有，豈是沉淪者。我亦方薄遊，低頭向人下。  
有志事竟成，古人不欺余。留將一白羽，待射魯連書。

送劉明府

賤士寡諧世，放屈江海邊。朋儔漸乖睽，憔悴不自妍。  
顧影鮮懽趣，惠離倍當年。它人亦以悲，况復如子賢。  
荒途風霜交，歲晏增慨然。亂雀噪荒蕪，棘驚鴻逝長天。  
斗酒豈足陳薄意，聊以宣出處。道既殊，不得長周旋。  
誰謂非遐方，浮雲阻山川。何以慰渴飢，令名期可傳。

暮歸

朝出鷄始啼，暮歸鳥欲棲。我身本無役，胡為亦東西。  
徒步二十年，風埃面空黧。入門聞隣杵，秋氣凜以淒。  
芙蓉墜古沼，絡緯鳴中閨。有無了不問，歌吟夜燈低。  
富貴固有日，我志焉能迷。笑向細君道，勿為翁子妻。



春日懷十友詩

余司馬堯臣

列戟衛嚴闕應無休沐暇群英罷追遊餘香掩空榭  
飛花北郭晚華月南園夜清景不能同蹉跎恐年謝

張校理羽

端居養恬素獨詠聖人篇夕景臨池酌春寒掩閣眠  
芳藥初翻雨新條稍披煙累日虧幽訪慙余塵務牽

楊署令基

詞苑擅高步早歲許追隨屢枉瑤華句長依瓊樹姿  
齋屋積冲抱園賞過秀時暫闕今朝會勞人耿耿思

王隱君行

共此一里屋誰令阻良覲惆悵步芳園山櫻還獨摘  
風含駐花意雨散流池跡尊酒不來同茲晨端可惜

呂道士敏

同謂在塵境獨能依道門園齋坐永日庭綠靄初繁  
觀妙風有契悟靜自無煩晨榮思頻往聆君超世言

宋軍咨克

看花西澗寺憶予昔同行蘭入華觴氣波汎綠琴聲  
茲歡隨節逝離恨坐相嬰安得重聯騎射雉出東城

徐記室賁



晨興理櫛罷禽聲悅清旭雨餘嘉樹新色暎春塘綠  
闌景感幽踪步陰思往躅攜手此逍遙須君慰心曲

陳孝廉則

徂春易爲感復此棲孤窳鶯啼遠林雨悵望鄰園隔  
客舍換衣晨僧齋聽鍾文知君思正紛雜英共如積

僧道衍

楞伽曾往問緣澗冒嵐深殘雪寒山暮幽扉閉竹林  
欲寄棲禪跡尚遠捐俗心別後空遙念迢迢雙樹陰

王徵士彝

遠客歎留滯對雨卧空房江上歸舟阻靡蕪春自芳

微疴偶見侵勝賞坐成妨斯章亦何取持擬釋離腸

